

白

蓮

集

開化圖書館

Kaishwa Library

二

開化圖書館

kaithua library

開化圖書館

Kaichua library

開化圖書館

Kaichua library

白蓮集卷第六

廬岳僧齊己撰

寄東林言之禪子

閑思相送後幽院閉苔錢使我吟還廢聞君病未痊聽  
秋惟困坐怕客但言眠可惜東窗月無聊過一年

寒節日寄鄉友

歲々逢寒食寥々古寺家踏青思故里垂白看楊花原  
野稀疎兩江天冷淡霞滄浪與湘水歸恨共無涯

聞西蟾從弟卜岩居岳西有寄

瀑布見高低岩開岩壁西碧雲多舊作紅葉幾新題滴  
漚中疎磬敲空半倚梯仍聞樵子逕不到前溪

寄懷西蟾師弟

蟾師有萬里八九月一身西北風之句

萬里八九月一身西北風自從相示後長記在吟中見  
說南遊遠堪懷我姓同江邊忽得信回到岳門東

撲滿子

祇愛滿我腹爭知滿害身到頭須撲破却散與他人

寄西川惠光大師曇域

禪月有名子相知面未曾筆精垂壁溜詩澁滴杉冰蜀  
國從栖泊蕪城幾廢興憶歸應寄夢東北過金陵

憶別匡山寄彭澤乾畫上人

憶別匡山日無端是遠遊却迴看五老翻悔上孤舟  
踏三千里蹉跎二十秋近來空寄夢時到虎溪頭

又寄彭澤畫公

聞君彭澤住結構近陶公種菊心相似嘗茶味不同湖  
光秋枕上岳翠夏窗中八月東林去吟香菡萏風

因覽支使孫中丞看可準大師詩序有寄

一千篇裏選三百首菁英玉尺新量出金刀舊翦成錦

江增古翠僊掌減元精

準公曾以詩遺訪司空圖于華下

自此為風格

留傳諸後生

新秋病中枕上聞蟬

枕上稍醒、忽聞蟬上聲此時知不死昨日即前生更  
欲臨窗聽猶難策杖行尋應同蛻殼重飲露華清

寄雲蓋山先禪師

曾尋湘水東古翠積秋濃  
長老禪栖處半天雲蓋風  
閒床饒得石雜樹少于松  
近有誰堪話瀏陽妙指蹤

落葉

落多秋亦晚窗外見  
請鄰世上誰驚盡林間  
獨埽頻蕭騷微月夜  
重疊早霜晨昨日繁陰  
在鶯聲樹上春

次耒陽作

遠岳復沿湘衡陽又耒陽  
不堪思北客從此入南荒  
旦夕多猿狖淹留少雪霜  
因經杜公墓惆悵學文章

舟中晚望祝融峰

天際卓寒青舟中望晚晴  
十年關夢寐此日向崢嶸  
巨石凌空黑飛泉照野明  
終當躡孤頂坐看白雲生

弔杜工部墳

鵬翅躡于斯明君知不知域中詩價大荒外土墳卑瘴  
雨無時滴蠻風有穴吹唯應學太白魂魄往來疲

岳中寄殷處士

出岳與入岳新題寄後題遍尋僧壁上多在鴈峰西近  
說遊江寺將誰話石梯相思立高巘山下草萋萋

送幽禪師

霜繁野葉飛長老卷行衣浮世不知處白雲相待歸磬  
和天籟响禪助岳神威莫使言長往勞生待發機

燒

獵獵寒蕪引承風執不還放來應有主焚去到何山燭

入空濛裏煙飛蒼莽間石中有良玉惆悵但傷顏

詠茶十二韻

百草讓為靈功先百草成甘傳天下口貴占火前名出  
靈春無雁收時谷有鶯封題從澤國貢獻入秦京鯁覺  
精新極嘗知骨自輕研通天柱響摘遠蜀山明賦客秋  
吟起禪師畫卧驚角開香滿室爐動絲凝鑄晚憶涼泉  
對閒思異菓并松黃乾旋泛雲母滑隨傾頗貴高人寄  
尤宜別匱盛曾尋修事法妙盡陸先生

寄陽岐西峰僧

西峰殘照東瀑布灑冥鴻閒憶高牕外秋晴萬里空藤  
陰藏石磴衣毳落杉風日有誰來覓層々鳥道中

迴雁峰

瘴雨過孱顏危邊有逕盤壯堪扶壽岳靈合置僊壇影  
北鴻聲亂青南客道難他年思隱遁何處凭闌干

贈詢公上人

威儀何貴重一室貯冰清終日松杉逕自多虫蟻行像  
前孤立影鍾外數珠聲知悟修來事今為第幾生

秋興

所見背時情閑行亦獨行晚涼思水石危閣望崢嶸雨  
外殘雲片風中亂葉聲舊山吟友在相憶夢應清

古寺老松

百歲禪師說先師指此松小年行道遠早見偃枝重月

檻移孤影秋庭卓一峰終當回疲電掣攫便雲龍

題無餘處士書齋

閒地從莎蘚誰人愛此心琴碁懷客遠風雪閉門深枕  
外江灘响窗西樹石陰他年衡岳寺為我一相尋

歲暮江寺住

山衣枯槁容何處見年終風雪軍城外蒹葭古寺中孤  
村誰認磬極浦夜鳴鴻坐憶匡廬隱泉聲滴半空

新燕

樓託近佳人應憐巧語新風光華屋暖絃管牡丹晨遠  
采江泥膩雙飛麥雨勻差池自有便敢觸杏梁塵

喻吟

日用是何專吟疲即坐禪此生還可喜餘事不相便頭  
白無邪裡魂清有象先江花與芳草莫染我情田

過湘江唐宏書齋

四隣無俗迹終日大開門水曉來邊雁林秋下楚猿一  
家誰難在雙眼向書昏况近騷人廟吟應是古魂

讀賈島集

遺編三百首首首是遺寃知到千年外更逢何者論離  
秦空得罪入蜀但聽猿還似長沙祖惟餘賦鵬言

寄山中諸友

自歸城裡寺長憶宿山門終夜冥心客諸峯叫月猿嵐  
先生眼力泉滴爽吟魂只待遊方遍還來掃樹根

懷終南僧

擾々二京塵何門是了因萬重千疊嶂一去不來人鳥  
道春殘雪蘿龕晝定身寥々石窗外天籟動衣巾

送二友生歸宜陽

二生俱我友清苦輩流稀舊國居相近孤帆秋共歸殘  
陽沙鳥亂疎雨島楓飛幾宿多山處猿啼燭影微

懷從弟

孤窗燭影微何事阻吟思兄弟斷消息山川長路岐月  
沈棲鶴島霜著叫猿枝可想為懷抱多愁多難時

岳陽道中作

客思尋常動未如今斷魂路岐經亂後風雪少人邨大

澤鳴寒雁千峰啼畫猿爭教此時白不上鬢須根

赴鄭谷郎中招遊龍興觀讀題詩板謁七貞儀  
像因有十八韻

何處陪遊勝龍興古觀時詩懸大雅作殿禮七貞儀遠  
繼周南美彌旌拱北思雄才垂朴畧後輩仰箴規對坐  
茵花暖偕行薜陣隳僧初學結朝服久慵披到霞琴  
棋傍登樓筆研隨論禪忘視聽譚老極希夷照日江光  
遠遶軒檜影歌觸鞋松子响窺立鶴雛癡始貴茶巡爽  
終憐酒散遲放懷還把杖憇石或搗頤眺遠凝清眇吟  
高動白鬣風鵬心不小蒿雀志徒卑願我專無作于身  
忘有為叨因五字解每忝重言期捨此應休也何人更

賞之淹留仙境晚迴騎雪風吹

書李秀才壁

干戈阻上書南國寄貧居舊里荒應盡新年病未除窗  
風連島樹門逕接鄰蔬我有閒來約相看雪滿株

聞尚顏下世

岳僧傳的信聞在麓山亡群有為詩客誰來弔影堂夢  
休尋灞澹迹已絕瀟湘遠憶同吟石新秋檜柏涼

薔薇

根本似玫瑰繁英刺外開香高蕝有架紅落地多苔去  
住間人看晴明遠蝶來牡丹先幾日銷歇向塵埃

送隆公上人

獨携談柄去千里指人寰未斷生徒望難教白日閒空  
江橫落照大府向西山好聘陳邨孔誰云劫石頑

宿簡寂觀

萬壑雲霞影千年松檜聲如何教下士容易信長生月  
共虛無白香和沆瀣清間尋古廊盡記得列仙名

遇元上人

七澤過名山相逢黃落殘杉松開寺晚泉月話心寒祖  
遍諸方禮經曾幾處看應懷出家院紫閣近長安

早梅

萬木凍欲折孤根暖獨回前村深雪裏昨夜一枝開風  
遞幽香去禽窺素豔來明年尤應律先發映春臺

聽泉

落石幾萬仞，遠聲飄冷空。  
高秋初雨後，半夜亂山中。  
只有照壁月，更無吹葉風。  
幾曾廬岳聽，到晚與僧同。

送孫逸人歸廬山

獨自携琴鶴，還歸瀑布東。  
逍遙非俗趣，楊柳謾春風。  
草遠村程綠，花盤石磴紅。  
他時許相覓，五老亂雲中。

聽李尊師彈琴

仙子弄瑤琴，仙山松月深。  
此聲含太古，誰聽到無心。  
洒石霜千片，歛崖泉萬尋。  
何人傳指法，携向海中岑。

寄武陵微上人

善卷臺邊寺，松筠繞祖堂。  
秋聲度風雨，曉色遍滄浪。  
白

石同誰坐清吟過我狂近聞為古律雅道更重光

匡山寓居栖公

外物盡已外閒游且自由好山逢過夏無事住經秋樹影殘陽寺茶香古石樓何時定休講歸嗽虎溪流

湘西道林寺陶太尉井

太尉遺孤井寒澄七百年未聞陵谷變終與姓名傳影浸無風樹光含有月天林僧晚來此滿汲洒金田

寄松江陸龜蒙處士

萬卷功何用狂稱處士休閑欵太湖石醉聽洞庭秋道在誰開口詩成自點頭中間欲相訪尋便阻戈矛

閉門

外事休關念，灰心獨閉門。  
無人來問我，白日又黃昏。  
燈集飛蛾影，窗消迸雪痕。  
中心自明了一句，祖師言。

看水

范蠡東浮濶，靈均北泛長。  
誰知遠煙浪，別有孖思量。  
故國門前急，天涯棹裡忙。  
難收上樓興，渺漫正斜陽。

寄栖白上人

萬國爭名地，吾師獨此閑。  
題詩招上看，雪下南山內。  
殿承恩久，中條進表還。  
嘗因秋貢客，少得捨禪關。

自題

禪外求詩妙，年來鬢已秋。  
未曾將一字，容易謁諸侯。  
挂夢山皆遠，題詩石盡幽。  
散言梁太子，傍采碧雲流。

孫丈使來借詩集曰有謝

冥搜從少小隨分得涪元聞說吟僧口多傳過蜀門相  
尋江島上共看夏雲根坐落遲遲日新題互把論

夏日言懷

苦被流年迫衰羸老病情得歸青嶂死便共白雲生樹  
枿燒爐响崖稜躡屐聲此心人信否魂夢自分明

早秋寄友生

雨多殘暑歇蟬急暮風清誰有閒心去江邊看水行河  
邊紅蓼簇野澗白煙平試折秋蓮葉題詩寄竺卿

送王秀才往松滋夏課

松滋聞古縣明府是詩家靜理餘無事歆眠盡落花江

光搖夕照柳影帶殘霞君與應相與乘船泛月華

喜晉公自武陵至

已盡滄浪興還思湘楚行鬢全無舊黑詩別有新清暫  
憇臨寒水時來扣靜荆囊中有靈藥終不獻公卿

假山并序

假山者蓋懷匡廬有作也往歲嘗居東郭因夢覺遂  
圖于壁乞于十秋而攢青疊碧於夢寐間宛若捫蘿  
挽樹而升彼絕頂今所作倣像一面故不盡萬壑千  
岩神仙鬼怪之宅聊得解懷既而功就乃激幽抱而  
作是詩終于一百八十言爾

匡廬久別離積翠杳天涯靜室曾圖峭幽庭復創奇典

衣酬土價擇日運工時信手成重疊隨心作蔽虧根盤  
驚院窄頂聳訝簷卑鎮地那言重當軒未厭危巨靈何  
忍擘秦正肯輕移曉覺莎煙觸寒聞竹籟吹藍灰澄古  
色泥水合凝滋引看僧來數牽吟客散遲九華渾彷彿  
五老頗參差蛛網藤蘿挂春霖瀑布垂加添雙石笋映  
帶小蓮池舊說雷居士曾聞遠大師紅霞中結社白壁  
上題詩顧此誠徒爾勞心是妄為經營慙培塿賞翫愧  
童兒會入千峰去閒蹤任屬誰

謝西川可準上人遠寄詩集

匡社經行外浹洲禪宴餘吾師還繼此後輩復何如江  
上傳風雅靜中詩卷舒堪隨樂天集共伴白芙蕖

秋空

已覺秋空極更堪寥泐青只應容好月爭合有妖星耿  
耿高河截脩脩一雁經曾于洞庭宿上下徹心靈

與聶尊師話道

伯陽遺妙旨杳々與冥々說即非難說行還不易行藥  
中迷九轉心外覓長生畢竟荒原上一盤蒿壠平

送相里秀才自京至却回

夷門詩客至楚寺閉蕭騷老病語言濳少年風韻高難  
于尋閭島險甚涉雲濤珍重西歸去無忘役思勞

謝人寄南榴卓子

幸附全材長良工斫器殊千枝文柏有一尺錦榴無品

格宜仙菓精光稱玉壺  
憐君遠相寄多愧野蔬粗

寄舊居隣友

別後如何趣搜奇  
少客同幾層山影下  
萬樹雪聲中晚  
鼎烹茶綠晨厨爨  
米紅何時携卷出  
世代有名公

送朱秀才歸閩

荆門來幾日欲往又囊空  
遠客歸南越單衣背北風  
近鄉微有雪到海漸無鴻  
努力成詩業無諸謁至公

龍潭作

乍臨毛髮豎雙壁夾湍流  
白日鳥影過青苔龍氣浮  
蔽空雲出石應禱雨翻秋  
四面耕桑者先聞賀有秋

依韻酬謝尊師見贈二首  
師欲調舉

南國搜竒久偏傷杜甫坟重来经漢浦又去入嵩雲舊  
別人稀見新朝事漸聞莫將高高迹間處傲明君  
岳頂休高卧荆門訪揜扉新詩遺我別舊約與誰歸賢  
路曾無滯良時肯自違明年窺月窟仙桂露霏微

送水禪再往湖中

行心宜肯住南去與誰群碧落高空處清秋一片雲穿  
林瓶影滅背雨錫聲分應笑遊方久龍鍾楚水濱

喜表公往楚王城

已聞人捨地結構舊基平一面湖光白隣家竹影清應  
難尋輦道空是王城誰信興亡迹今來有磬聲

春雪初晴喜友生至

數日不見日飄々勢忽開雖無忙事出還有故人來已  
盡南簷滴仍殘北牖堆明朝望平遠相約在春臺

殘春連雨中偶作懷友人

南鄰阻杖藜屐齒繞床泥漠々長門揜遲々日又西不  
知何興味更有好詩題還憶東林否行苔傍虎溪

送崔判官赴歸倅

白首從顏蒼青袍去佐官只應微俸祿聊補舊飢寒地  
說邱墟甚民間旱歉殘春風吹綺席賓主醉相歡

寒食日懷寄友人

萬井追寒食閑扉獨不開梨花應折盡柳絮自飛來夢  
覺懷仙島吟行繞砌苔浮生已悟了時節任相催

懷巴陵舊遊

洞庭雲夢秋空碧共悠々孟子狂題後何人更倚樓日  
西來遠棹風外見平流終欲重尋去僧窗古岫頭

招乾畫上人宿話

連夜因風雪相尋在寂寥禪心誰指示詩卷自焚燒語  
默隣寒漏窗扉向早朝天台若長往還渡海門潮

荆門秋日寄友人

青溪知不遠白首要難歸空想煙雲裏春風鸞鶴飛誰  
論傳法偈自補坐禪衣未謝侯門去尋常即捨扉

哭鄭谷郎中

朝衣聞典盡酒病覺難醫下世無遺恨傳家有大詩新

墳青嶂疊寒食白雲垂長憶招吟夜前年風雪時

白蓮集卷第六

卷六

六

卷六

三

開化圖書館

Kaichwa library

白蓮集卷第七

廬岳僧齊己撰

題東林十八賢貞堂

白藕花前舊影堂  
劉雷風骨畫龍章  
共輕天子諸侯貴  
同愛吾師一法長  
陶令醉多招不得  
謝公心亂入無方  
何人到此思高躅  
嵐默苔痕滿粉牆

謝靈運欲入社遠大師以其心亂却之

題南岳般若寺

諸峯翠少中峯翠  
五寺名高此寺名  
石路險盤嵐靄滑  
僧窗高倚泐溇明  
凌空殿閣由天設  
遍地松杉是自生  
更有上方難上處  
紫苔紅蘚遠崢嶸

寄廬岳僧

一聞飛錫別區中飛入西南瀑布峰天際雪埋千片石  
洞門冰折幾株松煙霞明媚栖心地苔蘚縈紆出世蹤  
莫向江邊舊居寺火燒兵劫斷秋鍾

遊谷山寺

城裏尋常見碧稜水邊朝莫送歸僧數峰雲脚垂平地  
一徑松聲徹上層寒澗不生浮世物陰崖尤積去年冰  
此生有底難拋事時復携筇信步登

楚寺寒夜作

寒爐局促坐成勞點澹燈光照二毛水寺閉來僧寂々  
雪風吹去雁啾々江山積疊歸程遠魂夢穿汾過處高  
畢竟忘言是吾道袈裟不稱揖蕭曹

送太禪師歸南岳

石龕閒鏤白猿邊  
歸去程途半在舡  
林簇曉霜離水寺  
路穿新燒入山泉  
已尋嵐壁臨空盡  
却看星辰向地懸  
有興寄題紅葉上  
不妨收拾別為編

山中寄凝密大師兄弟

一爐薪盡室空然  
萬象何妨在眼前  
時有興來還覓句  
已無心去即安禪  
山門影落秋風樹  
水國光凝夕照天  
借問荀家兄弟內  
八龍頭角讓誰先

海棠花

繁于桃李盛于梅  
寒食旬前社後歸  
半月暄和留豔態  
兩時風雨免傷摧  
人憐格異詩重賦  
蝶戀香多夜更來

尤得殘紅向春暮牡丹相繼發池臺

題贈湘西龍安寺利禪師

頭白已無行脚念自開荒寺住煙蘿門前路到瀟湘盡  
石上雲歸岳麓麓多南祖衣孟曾禮謁東林泉月舊經過  
閒來松外看城郭一片紅塵隔逝波

寄文浩百法

當時六祖在黃梅五百人中眼獨開入室偈聞傳絕唱  
升堂客謾恃多才鉄牛無用成貞角石女能生是聖胎  
聞說欲拋經論去莫教惆悵却空迴

謝人寄詩集

所聞新事即戈矛欲去終疑是暗投遠客寄言還有在

此 將謂惣無休千篇著述誠難得一字知音不易求  
時入思量向何處月圓孤凭水邊樓

謝元願上人遠檀溪集

白首蕭條居漢浦清吟編集號檀溪有人收拾應如玉  
無主知音只似泥入理半筒黃葉句遣懷多擬碧雲題  
猶能為我相思在千里封來夢澤西

寄道林寺諸友

吟興終依異境長舊遊時入靜思量江聲裡過東西寺  
樹影中行上下方春色濕僧巾屢膩松花沾鶴骨毛香  
老來何計重歸去千里重湖浪渺茫

贈智滿三藏

灌頂清涼一滴通大毗盧藏遍虛空欲飛蒼菊花無盡  
須待陀羅尼有功金杵力摧魔界黑水精光透夜燈紅  
可堪東獻明天子命服新醑贊國風

謝王先輩湘中回惠示卷軸

少小即懷風雅情獨能遺象琢涵精不教霜雪侵玄鬢  
便向雲霄換好名携去湘江聞鼓瑟袖來緱嶺伴吹笙  
多君百首貽衰颯畱把吟行訪竺卿

荆渚寄懷西蜀無染大師兄

大瀉心付白崖前寶月分輝照蜀天聖主降情延北內  
諸侯稽首向南禪清秋不動驪龍海紅日無私罔象川  
欲聽吾宗舊山說地邊身老楚江邊

謝武陵徐巡官遠寄五七字詩集

五字才將七字爭為君聊敢試懸衡  
湖蕙蒼搖金影蓬島鸞凰舞翠聲  
還是震龜巢得穩要須仙子駕方行  
雨編珍重遙相惠何日燈前盡此情

重宿舊房與愚上人靜話

曾此栖心過十冬今來瀟灑屬生公  
檀栾舊植青添翠蕙蒼新栽白換紅  
北面城臨燈影合西隣壁近講聲通  
不知門下趨士何似當時石解空

謝南平王賜山雞

五色文章類彩鸞楚人羅得半摧殘  
金籠莫恨傷冠幘玉粒須慚剪羽翰  
孤立影危丹檻裏雙栖伴在白雲端

上台愛育通幽細却放溪山去不難

荆門病中兩後書懷寄幙中知己

病根翻作憶山勞一雨聊堪浣鬱陶  
心白未能忘水月眼青猶得見秋毫  
蟬聲晚促枝々急雲影晴分片々高  
還憶赤松兄弟否別來應見鶴衣毛

宿江寺

島僧留宿慰衰顏舊住何妨老未還  
身共錫聲離島外迹同雲影過人間  
曾無夢入朝天路憶有詩題隔海山  
珍重來晨渡江去九華青裏扣松關

謝貫微上人寄示古風今體四軸

四軸騷詞書八行捧吟肌骨遍清涼  
謾求龍樹能醫眼

休向圖澄學洗腸今體盡搜初剖判古風滄鑿未玄黃  
不知誰肯降文陣閔黠旌旗敵子房

荊州貫休大師舊房

疎篁抽笋柳垂陰舊是休公種境吟入貢文儒來請益  
出官卿相駐過尋右軍書畫神傳髓康樂文章夢授心  
消得青城千嶂下白蓮標塔帝恩深

寄谷山長老

遊遍名山祖遍尋却來塵世渾光陰肯將的々吾師意  
擬付茫々弟子心豈有虛空遮道眼不妨文字向知音  
滄浪萬頃三更月天上何如水底深

寄黃暉處士

蒙氏藝傳黃士子獨聞相繼得名高鋒銳妙奪金雞距  
織利精分玉兔毫濡染只應親賦咏風流不稱近弓刀  
何妨寄我臨池興忍使江淹役夢勞

荆門勉懷寄道林寺諸友

榮枯得喪理昭然誰効離騷更向天生下便知真夢幻  
老來何必歎流年清風不變詩應在明月無蹤道可傳  
珍重匡廬沃州主披衣拋却好林泉

荅崔校書

雪色衫衣絕點塵明知富貴是浮雲不隨喧滑迷貞性  
何用潺湲洗污聞北闕會拋紅駮駮東林社憶白氤氳  
清吟有興頻相示欲答多慚蠹蝕文

乞櫻桃

去年曾賦此花詩  
幾聽南園爛熟時  
嚼破紅香堪換骨  
摘殘丹顆欲燒枝  
流鶯偷啄心應醉  
行客潛窺眼亦癡  
聞說張筵就珠樹  
任從攀折半離披

寄南雅上人

曾得音書慰暮年  
相思多故信難傳  
清吟何處題紅葉  
舊社空懷墮白蓮  
山水本同真趣向  
侯門剛有薄因緣  
他時不得君招隱  
會逐南歸楚客船

寄歐陽侍郎時在嘉州饋道

又聞繁惣在嘉州  
職重身闲倚市樓  
大象影和山面落  
兩江聲合郡前流  
綦輕國手知難敵  
詩是天才肯易酬

卷七  
六  
畢竟男兒自高達從來心不是悠々

與崔校書靜話言懷

同年生在咸通裏事物為儒趣盡高我性已甘披袒袖  
君心猶待脫藍袍霜髭曉幾臨銅鏡雪鬢寒疎落剃刀  
出世朝天俱未得不妨還往有風騷

謝人惠拄杖

邛州靈境產修篁九節材應表九陽造化已能分尺度  
保持爭合與尋常幽林翦破清秋影高手携來綠玉光  
深謝魯儒憐潦倒欲教撐拄遠禪床

謝秦府推官寄丹臺集

秦王手筆序丹臺不錯褒揚最上才鳳閣幾傳為匠碩

龍門曾用振風雷錢郎未竭精華去元白終存作者來  
兩軸蚌胎驪領耀枉臨禪室伴寒灰

題畫鸞兼簡孫郎中

曾向滄江看不真却因圖畫見精神何妨金粉資高格  
不用丹青點此身蒲葉岼長堪映帶荻花叢晚好相親  
思量畫得勝籠得野性由來不戀人

賀行軍太傅得白氏東林集

樂天歌詠有遺編留在東林伴白蓮百氏典墳隨喪亂  
一家風雅獨完全常聞荆渚通侯論果遂吳都使者傳  
仰賀斯文歸朗鑒永資聲政入薰絃

韶陽微公

曲江晴影石千株  
吾子思歸夢斷初  
有信北來山疊疊  
無言南去雨疎疎  
祖師門接園林路  
丞相家同井邑居  
閒野老身留得否  
相招多是秀才書

將之匡廬過潯陽

飄過潯陽晚霽開  
西風北鴈似相催  
大孤浪後青堆沒  
五老雲中翠疊來  
此路便堪歸水石  
何門更合向塵埃  
遠公林下蓮池畔  
箇箇高人盡有才

寄湘幕王重書記

拋擲汝江舊釣磯  
日參籌畫廢吟詩  
可能有事關心後  
得似無人識面時  
官好近聞加茜服  
藥靈曾說換霜髭  
高才直氣平生志  
除却徒知即不知

宿沈彬進士書院

相期只為話篇章  
踏雪曾來宿此房  
喧滑盡消城滿滴  
窗扉初掩岳茶香  
舊山春暖生薇蕨  
大國塵昏懼殺傷  
應有太平時節在  
寒宵未卧共思量

靜院

花院相重點  
破苔誰心肯  
此話心灰好  
風時傍疎篁  
起幽鳥  
晚從何處來  
筆研興狂詩  
沈謝香燈魂  
斷憶宗雷  
浮生已問空  
王了急箭光  
陰一任催

送白處士遊峨嵋

閒身誰道是羈遊  
西指峨嵋碧頂頭  
琴鶴幾程隨客棹  
風霜何處宿龍湫  
尋僧石磴臨天井  
研藥秋崖倒瀑流

莫為寰瀛多事在客星相逐不迴休

寄顧蟾處士好于山水

久聞為客過蒼梧休說移家歸鏡湖山水顛狂應盡在  
鬢毛凋落免貧無和僧搶入雲中峭帶鶴驅成澗底孤  
春醉醒來有餘興因人乞與武陵圖

懷金陵知舊

海門相別住荆門六度秋光兩鬢根萬象倒心難蓋口  
一生無事可傷魂石頭城外青山疊北固窗前白浪翻  
盡是共遊題板處有誰惆悵拂苔痕

驚秋

曉窗驚覺向秋風萬里心凝澹蕩中池影碎翻紅菡萏

并聲乾落綠梧桐破除閒事渾歸道銷耗勞生旋逐空  
妖殺尤原狐兔意豈知邱壠是英雄

聞沈彬赴吳起請辟

長訝高眠得穩無果隨徵辟起江湖鴛鴦已列尊壘貴  
鷗鶴休懷釣渚孤白首不妨扶漢祚清才何讓賦吳都  
可能更憶相尋夜雪滿諸峰火一爐

寄江夏仁公

寺閣高連黃鶴樓簷前檻底大江流幾因秋霽澄空外  
獨為詩情到上頭白日有餘閒送客紫衣何啻貴封侯  
別來多少新吟也不寄南宗老比丘

中春林下偶作

淨境無人可共携  
開眼未起日光低  
浮生莫把還丹續  
萬事須將至理齊  
花在月明蝴蝶夢  
雨餘山綠杜鵑啼  
何能向外求攀折  
岩桂枝條拂石梯

送劉秀才歸桑水宜觀

歸和初喜戢戈矛  
乍捧鄉書感去留  
鴈序分飛離漢口  
鵠原騫翥在鰲頭  
家隣紫塞仍千里  
路過黃河更幾州  
應到高堂問安後  
却携文入帝京游

寄曹松

舊製新題削復刊  
工夫過甚琢瑯玕  
藥中求見黃芽動  
詩裏思聞白雪難  
扣寂頗同心在定  
鑿空何止髮冲冠  
夜來月苦懷高論  
數樹霜邊獨傍欄

酌蜀國歐陽學士

因緣劉表駐經行又聽秋風墮葉聲鶴髮不堪言此世  
峨嵋空約在他生已從禪祖叅真性敢向詩家認好名  
深愧故人憐潦倒每傳仙語下南荆

寄荆幕孫郎中

珠履風流憶富春三千鷓鴣讓精神詩工鑿破清求妙  
道論研通白見貞四座共推操檄健一家誰信買書貧  
別來鄉國魂應斷劍閣東西盡戰塵

謝王詹事垂訪

鳥外孤峰未得歸人間觸類是無機方悲鹿軫栖江寺  
忽訝輶車降竹扉王澤乍聞譚渙汗國風那得話玄微

應驚老病炎天裏  
枯骨肩橫一衲衣

題南平後園牡丹

暖披烟艷照西園  
翠幄朱欄護列仙  
玉帳笙歌留盡日  
瑤臺伴侶待歸天  
香多覺受風光刺  
紅重知含雨露偏  
上客分明記開處  
明年開更勝今年

和李書記

繁極全分青帝功  
開時獨占上春風  
吳姬舞雪非貞豔  
漢后題詩是怨紅  
遠蝶戀香拋別苑  
野鶯銜得出深宮  
君看萬態當筵處  
羞殺薔薇點碎叢

謝孫郎中寄示

一念禪餘味國風  
早因持論偶名公  
久傷琴喪人亡後

忽有雲和雪唱同鉅琢靜聞第象外是非閒見寂寥中  
時來日往緣真趣不覺秋江度塞鴻

愛吟

正堪凝思捨禪扃又被詩魔惱竺卿偶凭窗扉從落照  
不眠風雪到殘更皎然未必迷前習支遁寧非悟後生  
傳寫會逢精鑿者也應知是詠閒情

寄懷東林寺匡白監事

南岳別來無後約東林歸住有前緣閒搜好句題紅葉  
靜斂雙眉對白蓮雁塔影分疎檜月虎溪聲合幾峰泉  
修心若似伊耶舍傳記須添十九賢

謝人惠十色花牋并碁子

卷七  
十一  
陵州碁子浣花牋深媿携来自錦川海蚌琢成星落  
吳綾隱出鴈翩、留防桂苑題詩客惜寄桃源敵手仙  
捧受不堪思出處七千餘里劍門前

夏日寓居寄友人

北遊兵阻復南還因寄荊州病揜關日月坐銷江上寺  
清涼魂斷刻中山披緇影迹堪藏拙出世身心合向閒  
多謝扶風大君子相思時對寂寥間

中秋十四日夜對月上南平主人

今宵前夕皆堪玩何必圓時始竭才空說輪中自天子  
不知何處有樓臺終憂明夜雲遮却且掃閒居坐看來  
玉兔銀蟾似多意乍臨棠樹影徘徊

謝人惠十才子圖

丹青妙寫十才人  
玉峭冰稜姑射神  
醉舞離披真鸞鷲  
狂吟崩倒瑞麒麟  
翻騰造化山曾竭  
采掇珠璣海幾貧  
猶得知音與圖畫  
草堂閒挂似相親

荆門病中寄懷鄉人歐陽侍郎彬

誰會荊州一老夫  
夢勞神役憶匡廬  
碧雲雁影紛々去  
黃葉蟬聲漸々無  
口澹莫分冷氣味  
身羸但覺病肌膚  
可憐饑玉燒蘭者  
肯慰寒隈雪夜爐

送譚三藏入京

阿闍黎與佛身同  
灌頂難施利濟功  
持呪力須資運祚  
度人心要似虛空  
東周路踏紅塵裏  
北極門瞻紫氣中

好進梵文沾帝澤却歸天策繼真風三藏住楚國天策寺

寄酬秦府高推官輦

天台衢岳舊曾尋閒憶留題白石林歲月已殘衰颯鬢  
風騷猶壯寂寥心緱山碧樹遮藏密丹穴紅霞掩映深  
爭得相逢一携手拂衣同去聽玄音

叙懷寄高推官

搜新編舊與誰評自向無聲認有聲已覺愛來多廢道  
可堪傳去更沾名風松韻裏忘形坐霜月光中共影行  
還勝御溝寒夜水狂吟衝尹甚傷情

送朱侍御自雒陽歸閬州寧觀

尋常西望故園時幾處魂隨落照飛客路舊縈秦甸出

鄉程今繞漢陽歸已過巫峽沉青靄忽認峨嵋在翠微  
從此倚門休望斷交親喜換老萊衣

貽惠暹上人

經論功餘更業詩又於難裏縱天機吳朝客見投文去  
楚國僧迎著紫歸已得聲名先振俗不妨風雪更探微  
金陵高憶恩門在終挂雲飄重一飛

酌西蜀廣濟大師見寄

猶得吾師繼頌聲百篇相愛寄南荆卷開錦水霞光爛  
吟入峨嵋雪氣清楚外已甘推絕唱蜀中誰敢共懸衡  
應懷無可同無本終向風騷作弟兄

江寺春殘寄幕中知己二首

誰遣西來負岳雲自由歸去更何因  
山龕薜荔應殘雪江寺玫瑰又度春  
早歲便師無學士臨年却作有為人  
何妨夜宴時相憶佯醉佯狂笑老身  
社蓮慚與幕蓮同岳寺蕭條儉府雄  
冷淡獨聞香火裏殷妍行列綺羅中  
秋加玉露何傷白夜醉金缸不那紅  
閒憶遺民此心地一般無染喻真空

寄玉泉寶仁上人

往歲曾尋聖跡時樹邊三遠禮吾師  
敢瞻護法將軍記且喜焚香弟子知  
後會未期心的、前峰欲下步遲、  
今來老劣難行甚空寂無緣但寄詩

荆渚懷寄僧達禪弟三首

電擊流年七十三齒衰氣沮竟何堪誰云有句傳天下  
自愧無心寄嶺南曉漱氣嫌通市井晚烹香憶落雲潭  
鄰峯道者還彈指薜剝藤纏舊石龕

十五年前會虎溪白蓮齋後便來西干戈時變信雖絕  
吳楚路長魂不迷黃葉喻曾同我悟碧雲情近與誰携  
春殘相憶荆江岸一隻杜鵑頭上啼

鶴嶺僧來細語君依然高尚迹難群自拋南岳三生石  
長傍西山數片雲丹訪葛洪無舊竈詩尋靈觀有遺文  
莫將離別為相隔心似虛空幾處分

寄孫魴秀才

郡樓東面市牆西顏子生涯竹屋低書案飛揚風落絮

地苔狼藉燕銜泥吟窗晚凭春篁密行徑斜穿夏菜齊  
別後相思頻夢到二年同此賦閒題

送李評事往宜春

蘭舟西去是通津名郡賢侯下禮頻山遍寺樓看仰岫  
臺連城閣上宜春鴻心夜過鄉心亂雪韻朝飛句韻新  
別有官榮身外趣月江松徑訪禪人

中春感興

春風日、雨時、寒力潛從暖勢衰一氣不言含有象  
萬靈何處謝無私詩通物理行堪掇道合天機坐可窺  
應是正人持造化盡驅幽細入爐鎚

早鶯

何處經年絕好音  
暖風吹出嚙喬林  
羽毛新刷陶潛菊  
喉舌初調叔夜琴  
藏雨並棲紅杏密  
避人雙入綠楊深  
曉來枝上千般語  
應共桃花說舊心

酬尚顏上人

紫綬蒼髭百歲侵  
綠苔芳草繞堦深  
不妨好鳥喧高卧  
切忌閒人聒正吟  
魯鼎寂寥休辨口  
叔灰銷燹莫宣心  
還憐我有冥搜癖  
時把新詩過竹尋

寄倪曙郎中

風雨冥冥春閣移  
紅殘綠滿海棠枝  
帝鄉久別江鄉住  
椿筍何如櫻筍時  
海內擅名君作賦  
林間外學我為詩  
近聞南國升南省  
應笑無機老病師

喜得自牧上人書

吳都使者泛驚濤  
震一傳書慰毳袍  
別興偶隨雲水遠  
知音本自國風高  
身依閑淡中銷日  
髮向清涼處落刀  
聞著括囊新集了  
擬教誰與序離騷

白蓮集卷第七

白蓮集卷第八

廬岳僧齊己撰

湘中寓居春日感懷

江禽野獸兩堪傷  
避射驚彈合自忙  
頭角任多無獬豸  
羽毛雖衆讓鴛鴦  
落苔紅小櫻桃熟  
侵井青纖燕麥長  
吟把離騷憶前事  
汨羅春恨撼殘陽

瀟湘

寒清健碧遠相合  
珠媚根源在極南  
流古遞今空作島  
逗山冲壁自為潭  
遷來賈誼愁無限  
謫過靈均恨不堪  
畢竟輸他老漁叟  
綠蓑青竹釣濃藍

寄友生

風騷情味近如何門底寒流屋裏莎曾摘園蔬留我宿  
共吟江月看鴻過時危苦恨無收拾道妙深嘗有琢磨  
涼夜敵眠應得夢平生心肺似君多

酬答退上人

鬚髻三分白二分一生蹤跡出人群嵩丘夢憶諸峰雪  
衡岳禪依五寺雲青衲幾臨高瀑濯苦吟曾許斷猿聞  
荒村殘臘相逢夜月滿鴻多楚水濱

山中春懷

心魂役々不曾歸萬象相牽向極微所得或憂逢郢刃  
凡言皆欲奪天機遊深晚谷香充鼻坐苦春松粉滿衣  
何物不為狼藉境桃花和雨落霏々

寄鄭谷郎中

上國誰傳消息過，醉眠醒坐對嵯峨。  
身離道士衣裳少，筆答禪師句偈多。  
南岫郡鐘涼度枕，西齋竹露冷沾莎。  
還應笑我降心外，惹得詩魔助佛魔。

寄萍鄉唐稟正字

新書聲價滿皇都，高卧林中更起無。  
春興酒香熏肺腑，夜吟雲氣濕鬕鬢。  
同登水閣僧皆別，共上魚船鶴亦孤。  
長憶前年送行處，洞門殘日照菖蒲。

秋夕書懷

涼多夜永擁山袍，片石閒欹不覺勞。  
蟋蟀繞床無夢寐，梧桐滿地有蕭騷。  
平生樂道心常切，五字逢人價合高。

卷八  
二  
破落西窗向殘月露聲如雨滴蓬蒿

亂後經西山寺

松燒寺破是刀兵谷變陵遷事可驚雲裡乍逢新住主  
石邊重認舊題名閒臨菡萏荒池坐亂踏鴛鴦破瓦行  
欲伴高僧重結社此身無計捨前程

題梁賢龔公房

吳王廟側有高房簾影南軒日正長吹苑野風桃葉碧  
壓畦春露菜花黃懸燈向後惟冥默凭案前頭即渺茫  
知有虎溪歸夢切寺門松折社僧亡

塘上閒作

閒行閒坐藉莎煙此興堪思二古賢陶靖節居彭澤畔

賀知章在鏡湖邊鴛鴦著對能飛綉  
菡萏成群不語仙  
形影騰々夕陽裏數峰危翠滴漁船

江上望遠山寄鄭谷郎中公時退居仰山

危碧層々映水天半垂岡墪下民田  
王維愛甚難拋畫  
支遁高多不惜錢巨石盡含金玉器  
亂峰閒鏤棟梁煙  
秦爭漢奪空勞力却是巢由得穩眠

送人自蜀迴南遊

錦水東浮情尚鬱湘波南泛思何長  
蜀魂巴狄悲殘夜  
越鳥燕鴻叫夕陽烟月幾般為客路  
林泉四絕是吾鄉  
尋幽必有僧相指  
宋杜題詩近舊房

寄无願上人

卷八  
三  
六十八去七十歲與師年鬢不爭多誰言生死無消處  
還有修行那得何閑事安能窮好惡故人堪憶舊經過  
會歸原上焚身後一陣灰飛也任他

懷瀟湘即事寄友人

浸野溼空淡蕩和十年隣住聽漁歌城臨遠棹浮煙泊  
寺近閑人泛月過岼引綠蕪春雨細汀連斑竹晚風多  
可憐千古懷沙處還有魚龍弄白波

謝橘洲人寄橘

洞庭栽種似瀟湘綠繞人家帶夕陽霜衰露蒸千樹熟  
浪迴風撼一洲香洪崖遣後名何遠陸續懷來事更長  
藏貯待供賓客好石榴宜稱映舟光

自貽

心中身外更何猜  
坐石看雲養聖胎  
名在好詩誰逐去  
跡依閒處自歸來  
時添瀑布新瓶水  
旋換旃檀舊印灰  
晴出寺門驚往事  
古松千尺半蒼苔

寄益上人

長想尋君道路遙  
亂山霜後火新燒  
近聞移住鄰衡岳  
幾度題詩上石橋  
古木傳聲連峭壁  
一燈懸影過中宵  
風騷味薄誰相愛  
欹枕常多夢鮑昭

行次宜春寄湘西諸友

幸無名利路相迷  
雙履尋山上柏梯  
衣鉢祖辭梅嶺外  
香燈社別橘洲西  
雲中石壁青侵漢  
樹下苔錢綠繞溪

我愛遠遊君愛住此心他約與誰携

送略禪者歸南岳

林下鐘殘又拂衣錫聲還獨向南飛千峰冷截冥鴻處  
一徑險通禪客歸青石上行苔片古杉邊宿雨霏  
勞生有願應回首忍著無心與物違

寄知己

已得浮生到老閒且將新句擬玄關自知清興來無盡  
誰道淳風去不還三百正聲傳世後五千真理在人間  
此心終待相逢說時復登樓看莫山

寄吳拾遺

新作將誰推重輕皎然評裡見權衡非無苦到難搜處

合有清垂不朽名  
疎雨晚冲蓮葉响  
亂蟬涼抱檜梢鳴  
野橋閒背殘陽立  
翻憶蘇卿送子卿

春晴感興

連旬陰翳曉來晴  
水滿圓塘照日明  
岼草短長邊過客  
江花紅白裡啼鶯  
野無征戰時堪望  
山有樓臺暖好行  
桑柘依依禾黍綠  
可憐歸去是張衡

謝道友拄杖

翦自南岩瀑布邊  
寒光七尺乳珠連  
持來未入塵埃路  
乞與應憐老病年  
欹影夜歸青石澗  
卓痕秋過綠苔錢  
他時携上嵩峰頂  
把倚長松看洛川

東林寄別修睦上人

行心乞得見秋風雙履難留更住蹤紅葉正多離社客  
白雲無限向嵩峰囊中自欠詩千首身外誰知事幾重  
此別不知為後約年華相似逼衰容

夏日原西避暑寄吟友

熱煙疎竹古原西日、乘涼此杖藜閒處雨聲隨霹靂  
早田人望隔虹霓蟬依獨樹乾吟苦鳥憶平川渴過齊  
別有相招好泉石瑞花瑤草盡堪携

懷匡阜

荆川連歲滯遊方拄杖塵封六尺光洗面有香思石溜  
冥心無撓憶山牀閒機但媿時機速靜論須慚世論長  
昨夜分明夢歸去薜蘿幽徑繞禪房

靜坐

繩床欹坐任崩頽  
雙眼醒々閉復開  
日月更無閒裏過  
風騷時有靜中來  
天真自得生難捨  
世幻論驚死不迴  
何處堪投此踪跡  
水邊去上高臺

寄湘中諸友

碧雲諸友盡黃眸  
石點花飛更說無  
嵐翠濕衣松接院  
芙蓉薰面寺臨湖  
沃洲高卧心何僻  
匡社長禪興亦孤  
爭似楚王文物國  
金鑣紫綬讓前途

答元願上人書

鄭生驅蹇峴山回  
傳得安公好信來  
千里阻修俱老骨  
八行重疊慰寒灰  
春殘桃李猶開戶  
雪滿杉松始上臺

必有南遊山水興  
漢江平穩好浮杯

送徹公歸閩

西朝歸去見高情  
應戀香燈近聖明  
關令莫疑非馬辨  
道安還跨赤驢行  
充齋野店蔬無味  
洒笠平原雪有聲  
忍惜文章便閒得  
看他趨競取時名

感時

忽々枕前蝴蝶夢  
悠悠覺後利名塵  
無窮今日明朝事  
有限生來死去人  
終與狐狸為窟穴  
謾師龜鶴養精神  
可憐顏子能消息  
虛室坐忘心最真

湖上逸人

澹蕩光中翡翠飛  
田田初出柳絲垂  
吟泐綠島時逢鶴

醉泛清波或見龜七澤釣師應識我中原逐鹿不知誰  
秋風水寺僧相近一徑蘆花到竹籬

懷巴陵

垂白堪思大亂前薄遊曾駐洞庭邊尋僧古寺沿沙岫  
倚杖殘陽落水天蘭芷薦菸騷客廟烟波晴閣釣師舡  
此時欲買君山住懶就商人乞個錢

渚宮謝楊秀才自嵩山相訪

嵩峰有客遠相尋塵滿麻衣袖苦吟花盡草長方閉戶  
道孤身老正傷心紅堆落日雲千仞碧撼涼風竹一林  
惆悵雅聲消歇去喜君聊此暫披襟

荆門寄沈彬

罷趣明聖懶從知鶴氅禱褫遂性披道有靜君堪託迹  
詩無賢子擬傳誰松聲白石邊行止日影紅霞裏夢思  
珍重兩篇千里達去年江上雪飛時

讀陰符經

繞窗風竹骨輕安閒借陰符仰卧看絕利一源真有謂  
空勞萬卷是無端清虛可保昇雲易嗜欲終知入聖難  
三要洞開何用閉高臺時去凭欄杆

寄吳國知舊

淮甸當年憶旅遊衲衣樓笠外何求城中古巷尋詩客  
橋上殘陽背酒樓晴色水雲天合影晚聲名利市爭頭  
可憐王化融之裏惆悵無僧似惠休

移居

上台言任養疎愚乞與西城水滿湖吹榻好風終日有  
趣涼開客片時無檀藥翠擁清蟬在齒苔紅殘白鳥孤  
欲問存思搜挾妙幾聯詩什敵三都

喜彬上人遠見訪

高吟欲繼沃洲師千里相尋問課虛殘臘江山行盡處  
滿衣風雪到閒居携來律韻清何甚趣入幽微旨不疎  
莫惜天機細搥琢他時終可擬芙蓉

荊州新秋寺居寫懷詩五首上南平王

竹如翡翠侵簾影苔學琉璃布地紋高卧更應無此樂  
遠遊何必愛他雲閒聽謝眺吟為政靜看蕭何坐致君

只恐老身衰朽速他年不得頌鴻勳

井梧黃落暮蟬清久駐金臺但暗驚事佛未憐諸弟子  
譚空爭動上公卿合歸鳥外藏幽跡敢向人前認好名  
滿印白檀燈一盞可能酬謝得聰明

金湯裡面境何求寶殿東邊院最幽栽種已添新竹影  
畫圖兼列遠山秋形容豈合親公子章句爭堪狎士流  
虛負岷峨老僧約年：雪水下汀洲

漢江西岼蜀江東六稔安禪教化中託迹幸將王粲別  
歸心宜與子山同尊壘豈識曹叅酒賓坐還親宋玉風  
又見去年三五夕一輪寒魄破烟空

石龕間鏤舊居峰何事膺門歲月重五七詩中叨見過

三千客外許疎慵  
迎涼蟋蟀喧閒思  
積雨莓苔沒履踪  
會待英雄啟金口  
却教擔錫入雲松

送李秀才歸湘中

詞客携文訪病夫  
因吟送別憶湘湖  
寒消浦溆催鴻雁  
暖入溪山養鷓鴣  
僧向月中尋岳麓  
雲從城上去蒼梧  
君歸為問峰前寺  
舊住松房鎖在無

寄吳國西供奉

別來相憶夢多迷  
君住東朝我楚西  
瑤闕合陪龜象位  
春山休記鷓鴣啼  
承恩位與千官別  
應制才將十子齊  
幾笑遠公慵送客  
殷勤只到寺前溪

謝人惠端溪硯

端人鑿斷碧雲濤善價爭教惜萬金  
龔琢已曾經敏手  
研磨終見透堅心安排得主難移動  
舍財隨時任淺深  
保重更求裝鈿匣閒將濡染寄知音

送吳先輩赴京

烟霄已遂明經第江漢重來問苦吟  
託興偶憑風月遠  
忘機終在寂寥深千篇未聽常徒口  
一字須防作者心  
此日與君聊話後老身難約更相尋

和西蜀可準大師遠寄之什

莫知何路去追攀空想人間出世間  
杜口已同居士室  
傳心休問祖師山禪中不住方為定  
說處無生始是閒  
珍重希音遠相寄亂峰西望疊孱顏

荆門暮冬與節公話別

漳河湘岸柳關頭  
離別相逢四十秋  
我憶黃梅夢南國  
君懷明主去東周  
幾程霜雪經殘臘  
何處封疆過舊遊  
好及春風承帝澤  
莫忘衰朽卧林丘

賀孫支使郎中遷居

別認公侯禮上才  
築金何翅舊燕臺  
地連東閣橫頭買  
門對西園正面開  
不隔紅塵趨祭戰  
只拖珠履赴尊罍  
應逢明月清霜夜  
閒鎖笙歌宴此來

庭際新移松竹

三莖瘦竹兩株松  
瑟瑟脩脩韻且同  
抱節乍離新澗雪  
盤根遠別舊林風  
歲寒相倚無塵地  
蔭影分明有月中

更待陽和信催促碧梢青杪看凌空

荆門寄題禪月大師影堂

澤國聞師泥日後蜀王全禮葬餘灰白蓮塔向青泉鏤

禪月堂臨錦水開西岳千篇傳古律

大師著西岳集三十卷盛傳於世

南宗一卷印靈臺不堪隻履還西去葱嶺如今無使迴

賀雪

上清凝結下乾坤為瑞為祥表致君日月影從光外過

山河影向靜中分歌揚郢路誰同聽聲洒梁園客共聞

堪想畫堂簾捲次輕隨舞袖正紛

荊州寄貫微上人

舊齋休憶對松關各在王侯顧遇問命服已沾天渥澤

衲衣猶擁祖爛斑相思莫抹燒心火留滯難移壓腦山  
得失兩途俱不是笑他高卧碧孱顏

送休師歸長沙宜觀

高堂親老本師存多難長懸兩處魂已說戰塵消漢口  
便隨征棹別荆門晴吟野澗無耕地晚宿灣深有釣村  
他日更思衰老否七年相伴琢詩言

江上夏日

無處清陰似剡溪火雲奇崛倚空齊千山冷疊湖光外  
一扇涼搖楚色西碧樹影疎風易斷綠蕪平遠日難低  
故園舊寺臨湘水斑竹煙深越鳥啼

渚宮春日因懷有作

舊業樹連湘樹遠家山雲與岳雲平僧來已說無畊釣  
鴈去那知有弟兄客思莫牽蝴蝶夢鄉心自憶鷓鴣聲  
沙頭南望堪腸斷誰把歸舟載我行

松化為石

近潤金華山  
古松化為石

盤根幾聳翠岩前却偃凌雲化至堅乍結精華齊永劫  
不隨凋變已千年逢賢必用鑄辭立遇聖終將刻印傳  
肯似荆山鑿餘者蘇封頑滯卧嵐煙

寄澧陽吳使君

南客西來話使君澧陽風雨變行春四隣畊釣趨仁政  
千里煙花壓路塵去獸未勝除狡吏還珠爭似復逋民  
紅蘭浦暖携才子爛醉連題賦白蘋

湘江送客

湘江秋色湛如水  
楚客離懷暮不勝  
千里碧雲聞塞雁  
幾程青草見巴陵  
寒濤響疊晨征擗  
岼葦蕪明夜泊燈  
鸚鵡洲邊若迴首  
為思前事一捫膺

暮遊岳麓寺

寺樓高出碧崖棱  
城裏誰知在上層  
初雪灑來喬木暝  
遠禽飛過大江澄  
閒消不睡憐長夜  
靜照無言謝一燈  
回首何邊是空地  
四村桑麥遍丘陵

林下留別道友

住亦無依去是閒  
何心終戀此林間  
片雲孤鶴東西路  
四海九州多少山  
靜坐趁涼移樹影  
興隨題處著苔斑

秋來洗浣行衣了還爾鄰僧舊竹關

道林寺居寄岳麓禪師二首

門前石路徹中峰樹影泉聲在半空尋去未應勞上下  
往來殊已倦西東髭根盡白孤雪並心迹全忘片月同  
長憶高窗夏天裏古松青檜午時風

山袍不稱下紅塵各是閒居鳥外身兩處烟霞門寂々  
一般苔蘚石磷々禪關悟後宜疑物詩格玄來不傍人  
月照經行更誰見露華松粉點衣巾

亂後江西遇孫魴舊居因寄

舊遊重到倍悲涼吟憶同人倚寺廡何處莫蟬喧逆旅  
此中山鳥噪垂楊寰區有主權兵器風月無人掌桂香

欲寄此心空北望寒鴻天末失歸行

宜春江上寄仰山長老二首

水隔孤城、隔山水邊時望憶師閒清泉白石中峰上  
落日半空栖鳥還雲影觸衣分朶、雨聲吹磬散潺、  
傳心莫學羅浮去後輩思量待扣關

雨晴天半碧光流影倒殘陽濕郡樓絕頂有人經劫在  
浮生無客暫時遊窗開萬壑春泉亂塔鏤孤燈萬木稠  
欲為吾師拂衣去白雲紅葉又新秋

螢

透牕穿竹住還移萬類俱開始見伊難把寸光藏暗室  
自持孤影助明時空庭散逐金風起亂葉爭投玉露垂

後代儒生懶收拾夜深飛過讀書帷

湘中送翁員外歸闕

船滿琴書與酒杯清湘影裏片颿開人歸南國鄉園去  
鴈逐西風日夜來天執漸低分海樹山程欲盡見城臺  
此身未別江邊寺猶看星郎奉詔回

寄居道林寺作

嵐濕南朝殿塔寒此中因得謝塵寰已同庭樹千株老  
未負溪雲一片閒石鏡舊遊臨皎潔岳蓮曾上徹孱顏  
如今衰颯成多病黃葉風前晝掩關

沙鷗

暖傍漁舩睡不驚可憐孤潔似華亭晚來灣浦衝平碧

晴過汀洲拂淺青翡翠靜中修羽翼鴛鴦閒處事儀形  
何如飛入深宮去留與興亡作典經

和翁員外題馬太師宅賈相公井

飛塵不敢下相干閣脈傍應潤牡丹心任短長投玉綆  
底須三五映金盤神工舊制泓澄在天澤時加潏灑寒  
太傅欲旌前古事星郎屬思久憑欄

看雲

何峰觸石濕苔錢便逐高風離瀑泉深處卧來真隱逸  
上頭行去是神僊千尋有影滄江底萬里無踪碧落邊  
長憶舊山青壁裏繞庵閒伴老僧禪

對雪寄荆幕知己

猛執微開萬里清月中看似日中明此時鷗鷺無人見  
何處關山有客行郢唱轉高誰敢和巴歌相顧自銷聲  
江齋卷箔含毫久應想梁王禮 經

送相里秀才赴舉

兩上東堂不見春文明重去有誰親曾逢少海尊前客  
舊是神僊會裏人已遂風雲催化羽却將雷電助燒鱗  
明年自此登龍後回首京門一路塵

荆門疾中喜謝尊師自南岳來相里秀才自京  
間堂晝卧眼初開強起徐行繞砌苔鶴氅人從衡岳至  
鶉衣客自雒陽來坐聞隣樹栖幽鳥唵見江雲發早雷  
西咲東遊此相別兩塗消息待誰回

吟興自述

前習都由未盡空生知  
頑學妙難窮一千首出悲哀外  
五十年銷雪月中興去不妨歸靜慮情來何止發貞風  
曾無一字干聲利豈媿操心負至公

送謝尊師自南岳出入京

曾聽鹿鳴逢世亂因披羽服隱衡陽  
幾多事隔丹霄興三十年成兩鬢霜  
芝朮未甘消勇氣風騷無那激剛腸  
中朝舊有知音在可是悠々入帝鄉

送司空學士赴京

弘文初命下江邊難戀沙鷗與釣船  
藍綬乍稱新學士白衫初脫舊神僊  
龍山送別風生路雞樹從容雪點筵

重謁往年金榜主便將才術佐陶甄

白蓮集卷第八

開化圖書  
Kachua Library

白蓮集卷第九

廬岳僧齊己撰

春寄尚顏

含桃花謝杏花開  
杜宇新啼燕子來  
好事可能無分得  
名山長似有人催  
簷聲未斷前旬雨  
電影還連後夜雷  
心跡共師爭幾許  
俗人嫌處自遲迴

寄梁先輩

慈恩塔下曲江邊  
別後多應夢到仙  
時去與誰論此事  
亂來何處覓同年  
陳琳筆硯甘前席  
舟里煙霞待共眠  
愛惜麻衣好顏色  
未教朱紫污天然

荆渚偶作

無味吟詩即把經，竟將疎野訪誰行。  
身依江寺庭無樹，山繞天涯路有兵。  
竹瓦雨聲漂永日，紙窗燈焰照殘更。  
從容一覺清涼夢，歸到龍潭埽石枰。

城中晚夏思山

葛衣沾汗功雖健，紙扇搖風力甚卑。  
苦熱恨無行脚處，微涼喜到立秋時。  
竹軒靜看蜘蛛掛，莎徑閑聽蟋蟀移。  
天外有山歸即是，豈同遊子暮何之。

憶舊山

誰請衰羸住北州，七年魂斷舊山丘。  
心清檻底瀟湘月，骨冷禪中太華秋。  
高節未聞馴虎豹，片言何以傲王侯。  
應須脫洒孤峯去，始是分明個剃頭。

寄骸休

南州歸去為尋醫病色應除是舊時久別莫忘廬阜約  
却來須有洞庭詩金陵往歲同窺井峴首前秋共讀碑  
兩處山河見興廢相思更切卧雲期

過陸鴻漸舊居

陸生自有傳于井石又云  
行坐誦佛書故有此句

楚客西來過舊居讀碑尋傳見終初佯狂未必輕儒業  
高尚何妨誦佛書種竹岼香連菡萏煮茶泉影落蟾蜍  
如今若更生來此知有何人贈白驢

時太守  
贈白驢

寄懷鍾陵舊遊因寄知己

洪井僧來說舊遊西江東岸是城樓昔年淹跡因王化  
長日凭欄看水流貞觀上人栖樹石陳陶處士在林丘

終拖老病重尋去得到匡廬死便休

遣懷

病腸休洗老休醫七十能饒百歲期不死任還蓬島客  
無生自有雪山師浮雲聚散堪關慮明月相逢好展眉  
既兆未萌閒酌度不知中抱自尋思

懷武陵因寄幕中韓先輩何從事

武陵嘉致迹多幽每見圖經恨白頭溪浪碧通何處去  
桃花紅過郡前流嘗聞相幕駕鴻 日向神仙洞府遊  
鑿井耕田人在否如今天子正徵搜

贈樊處士

小子聲名天下知滿簪霜雪白麻衣誰將一著爭先後

共向長安定是非有路未曾謀  
日用無貪終不亂天機  
閒尋道士過仙觀  
賭得黃庭兩卷歸

荆渚逢禪友

澤國相逢話一宵  
雲山偶別隔前朝  
社思匡岳無宗炳  
詩憶揚州有鮑昭  
晨野黍離春漠漠  
水天星燦夜迢迢  
閒吟莫忘傳心祖  
曾立塔前雪到腰

送僧歸洛中

赤日彤霞照晚坡  
東州道路興如何  
蟬離楚柳鳴猶少  
葉到嵩雲落漸多  
海內自為閒去住  
關頭誰問舊經過  
丁盜與訪春山寺  
白樂天真在也麼

道林寓居

秋泉一片樹千株暮汲寒燒外有餘青嶂者邊來已熟  
紅塵那畔去應疎風騷未肯忘雕琢瀟灑無妨更剝除  
即問沃州開士僻愛禽憐駿意如何

僊掌

峭形寒倚夕陽天毛女蓮花翠影連雲外自為高出手  
人間誰合鬪揮拳鶴拋青漢來岩檜僧隔黃河望頂烟  
晴露紅霞長滿掌只應栖託是神僊

中秋月

空碧無雲露濕衣群星光外湧清規東樓莫碍漸高影  
四海待看當午時還許分明吟皓魄肯教幽暗取丹枝  
可憐半夜婵娟影正對五侯殘酒池

送禪者遊南岳

忽隨南棹去潯陽誰住江邊樹下房塵夢是非都覺了  
野雲心地更何妨漸臨瀑布聽猿思却背岫嶺看鴈行  
想到中峰上層寺石窗秋霽見瀟湘

聞道林諸友嘗茶因有寄

旗槍冉々綠叢圓穀雨初晴叫杜鵑摘帶岳華蒸曉露  
碾和松粉煮春泉高人夢惜藏岩裡白碓封題寄火前  
應念苦吟耽睡起不堪無過夕陽天

將歸舊山留別錯公

舊峰前昨下來時白石叢々間紫薇章句不堪歌有道  
溪山只合退無機雲含暖態晴猶在鶴養閒神畫不飛

欲去更思過丈室二年頻此挹清暉

聞尚顏上人剏居有寄

麓山南面橘洲西別構新齋與竹齊  
野客已聞將鶴贈江僧未說有詩題  
窗臨杳靄寒千嶂枕遍潺湲月一溪  
可想乍移吟榻處松陰冷濕壁新泥

庚午歲九日作

門底秋苔嫩似藍此中消息興何堪  
亂離偷過九月九頭尾筭來三月三  
雲影半晴開夢澤菊花微暖傍江潭  
故人今日在不在胡雁背風飛向南

逢進士沈彬

欲話趨時首重搔因君倍惜剃頭刀  
千般貴在能過達

一片心閒不那高山疊好雲藏玉鳥海翻狂浪隔金鰲  
時應記得長安事曾向文場屬思勞

聞王員外新恩有寄

欲退無因貴逼來少儀官美右丞才青袍早訪淹花幕  
霜簡方聞謝柏臺金諾靜宜資講誦玉山寒稱奉樽罍  
西峰有客思相賀門隔瀟湘雪未開

秋夕言懷寄所知

休問蒙莊材不材孤燈影共傍寒灰忘詮話道心甘死  
候體論詩口懶開窗外風濤連建業夢中雲木憶天台  
相疎却是相知分誰訝經年一度來

答禪者

五老峰前相遇時，兩無言語只揚眉。  
南宗北祖皆如此，天上人間更問誰。  
山衲靜披雲片，鏡刀涼削髮絲。  
閒吟莫學湯從事，拋却袈裟負本師。

寄尚顏公受徐州薛尚書見知

莫向孤峯道息機，有人偷眼羨吾師。  
滿身光化年前寵，幾軸開平歲裡詩。  
北闕故人隨喪亂，南山舊寺在參差。  
清吟但憶徐方政，應恨當時不見時。

梓栗杖送人

禪家何物贈分襟，只有天台杖一尋。  
拄去客歸青洛遠，采來僧入白雲深。  
遊山曾把探龍穴，出世期將指佛心。  
此日江邊贈君後，却携筇竹向東林。

寄朗陵二禪友

瀟湘曾宿話詩評荆楚連秋阻野情  
金錫罷遊雙鬢白  
鐵盃終守一齋清  
篇章老欲齊  
高手風月閒  
思到極精  
南望山門石何處  
滄浪雲夢浸天橫

燈

幽光耿々草堂空  
窗隔飛蛾恨不通  
紅燼自凝清夜朶  
赤心長謝碧紗籠  
雲藏水國城臺裡  
雨閉松門殿塔中  
金屋玉堂開照睡  
豈知螢雪有深功

寄金陵幕中李郎中

龍門支派富才能  
年少飛翔便大鵬  
久待尊壘臨鉄瓮  
又從幢節鎮金陵  
精神一隻秋空鶴  
騷雅千尋夏井冰

長憶相招宿華館數宵忘寢盡寒燈

寄韓蛻秀才

松門高不似侯門  
蘚徑鞋踪觸處分  
遠事即為無害鳥  
多閒便是有情雲  
那憂寵辱來驚我  
且寄風騷去敵君  
知伴李膺琴酒外  
絳紗閒卷共論文

湘中春興

雨歇江明苑樹乾  
物妍時泰恣遊盤  
更無輕翠勝楊柳  
盡覺濃華在牡丹  
終日去還拋寂寞  
遠池迴却凭欄杆  
紅芳片、由青帝  
忍向西園看落殘

送錯公栖霞南遊

洪偃湯休道不殊  
高颿共載興何俱  
北京喪亂離丹鳳

南國煙花入鷓鴣  
明月團圓臨桂水  
白雲重疊起蒼梧  
威儀本是朝天士  
暫向遼荒住得無

寄南嶽諸道友

南望衡陽積瘴開  
去年曾踏雪遊回  
謾為楚客蹉跎過  
却是邊鴻的當來  
乳竇孤明含海日  
石橋危滑長春苔  
終尋十八高人去  
共坐蒼崖養聖胎

送韓蛻秀才赴舉

槐花館駟莫塵昏  
此去分明吏部孫  
才氣合居科第首  
風流幸是薦紳門  
春和洛水清無浪  
雪洗高峰碧斷根  
堪想都人齊指點  
列仙相次上崑崙

溪居寓言

秋蔬數壠傍潺湲頗覺生涯異俗緣詩興難窮花草外  
野情何限水雲邊蟲聲遶屋無人語月影當松有鶴眠  
寄向東溪老樵道莫摧丹桂博青錢

遣懷

詩病相兼老病深世醫徒更費千金餘生豈必虛拋擲  
未死何妨樂詠吟流水不迴休歎息白雲無跡莫追尋  
閒身自有閒消處黃葉清風蟬一林

自湘中將入蜀留別諸友

中舄初隨入蜀舡風帆吼過洞庭烟七千里路到何處  
十二峰雲更那邊巫女暮歸林浙瀝巴猿吟斷月婵娟  
來年五月峨眉雪坐看消融滿錦川

寄匡阜諸公

松頭柏頂碧森々，虛檻寒吹夏景深。  
靜社可追長往跡，白蓮難問久修心。  
山圍四面纔容寺，月到中宵始滿林。  
爭學忘言住幽勝，吾師遺集盡清吟。  
峰前林下東西寺，地角天涯來往僧。  
泉月淨流閒世界，杉松深鏤畫香燈。  
爭無大士重修社，合有諸賢更服膺。  
曾寄隣房掛瓶錫，雨聞簷溜解春冰。

送人入蜀

何必閒吟蜀道難，知君心出嶮巖間。  
尋常秋泛江陵去，容易春浮錦水還。  
兩面碧懸神女峽，幾重青入丈人山。  
丈君酒市逢初雪，滿貫新沽洗旅顏。

酬廬山張處士

髮枯身老任浮沈，懶泥秋風更役吟。  
新事向人堪結舌，舊詩開卷但傷心。  
苔床卧憶泉聲繞，麻履行思樹影深。  
終謝柴桑與彭澤，醉遊訪入東林。

寄峴山道人

鳳門高對鹿門青，往歲經過恨未平。  
辨鼎上人方話道，卧龍丞相忽追兵。  
爐峰已負重迴計，華岳終懸未去情。  
聞說東周天子聖，會搖金錫却西行。

送王處士遊蜀

又掛寒帆向錦川，木蘭舟裏過殘年。  
自修姁、爐中物擬作飄、水上僊。  
三峽浪喧明月夜，萬州山到夕陽天。

來年的有荆南信迴札應緘十色箋

懷金陵李推官僧自牧

秣陵長憶共吟遊  
儒釋風騷盡上流  
蓮幕少年輕謝眺  
雪山真子鄙湯休  
也應有作懷清苦  
莫謂無心過白頭  
欲附別來千萬意  
病身初起向殘秋

寄尋萍公

聞在湓城多寄住  
隨時談笑混塵埃  
孤峰忽憶便歸去  
浮世要看還下來  
萬頃野煙春雨斷  
九條寒浪晚窗開  
虎溪橋上龍潭寺  
曾此相尋踏雪迴

得李推官近寄懷

荆門前歲使乎回  
求得星郎近制來  
連日借吟終不已

卷九  
一燈忘寢又重開秋風漫作牽情賦春草真為入夢才  
堪笑陳宮諸狎客當時空有個追陪

對菊

蝶醉蜂狂半折時冷烟清露壓離披欲傾琥珀盃浮爾  
好把茱萸朶配伊孔雀毛衣應者是鳳凰金翠更無之  
何因栽向僧園裏門外重陽過不知

憶東林因送二生歸

好向東林度此生半天山脚寺門平紅霞嶂底潺湲色  
清夜房前瑟瑟聲偶別十年成瞬息欲來千里阻刀兵  
可憐二子同歸去南國烟花路好行

渚宮西城池上居

城東移錫住城西綠繞春波引杖藜翡翠滿身衣有異  
鷺鷥通體格非低風搖柳眼開煙小暖逼蘭芽出土齊  
猶有幽深不相似剡溪乘棹入耶溪

中秋夕愴懷寄荆幕孫郎中

白蓮香散沼痕乾綠篠陰濃蘚地寒年老寄居思隱切  
夜涼留客話時難行僧盡去雲山遠賓雁同來澤國寬  
時謝孔璋操檄外每將空病問衰殘

酬湘幕徐員外見寄

東海儒宗事業全水稜孤峭類神仙詩同李賀精通鬼  
文擬劉軻妙入禪珠履早曾從相府玳簪今又別賓筵  
篇章幾謝傳西楚空想雄風度十年

寄蜀國廣濟大師

冰壓霜壇律格清三千傳授盡門生  
禪心靜入空無跡  
詩句閒搜寂有聲滿國繁華徒自樂  
兩朝更變未曾驚  
終思相約岷峨去不得携筇一路行

答獻上人卷

衲衣禪客袖篇章江上相尋共感傷  
秦甸亂來栖白沒  
苾山空後皎然亡清留島月秋凝露  
苦寄巴猿夜叫霜  
珍重南宗好才子灰心冥目外無妨

寄武陵貫微上人二首

知泛滄浪棹未還西峯房鏢夜潺湲  
春陪相府遊仙洞  
雪共賓寮對柱山詩裏幾添新菡萏  
衲痕應換舊爛斑

莫忘一句曹溪妙堪塞孫、騁度關  
吳頭東面楚西邊雲接蒼梧水浸天  
兩地別離身已老  
一言相合道休傳風騷妙欲凌春草  
蹤跡閒思繞岳蓮  
不是傲他名利世吾師本在雪山巔

懷體休上人

仲宣樓上望重湖君到瀟湘得健無  
病遇何人分藥餌  
詩逢誰子論功夫杉蘿寺裏尋秋早  
橘柚洲邊度日晡  
許送自身歸華岳待來朝暮拂瓶盂

招湖上兄弟

去歲得君消息在兩憑人信過重湖  
忍貪風月當年少  
不寄音書慰老夫藥鼎近聞傳祕訣  
詩門曾說擁寒爐

漢江、路西來便好傍扁舟訪我無

江居寄關中知己

多病多慵漢水邊  
流年不覺已皤然  
舊栽花地添黃竹  
新盆池換白蓮  
雪月未忘招遠客  
雲山終待去安禪  
八行書札君休問  
不似風騷寄一篇

中秋十五夜寄人

高河瑟瑟轉金盤  
噴露吹光逆凭欄  
四海魚龍精魄冷  
五山鸞鶴骨毛寒  
今宵盡向圓時望  
後夜誰當缺處看  
何事清光與蟾兔  
却教才子少留難

謝人自鍾陵寄紙筆

故人猶憶苦吟勞  
所惠何殊金錯刀  
霜雪翦裁新刻硯

鋒銚管束本宣毫知君倒篋情何厚借我臨池價斗高  
詞客分張看欲盡不堪來處隔秋濤

移居西湖作二首

火雲陽熯欲燒空小檻幽窗想舊峰白汗此時流枕簟  
清風何處動杉松殘更好眠涼月遠寺俄聞報曉鐘  
只待秋聲滌心地衲衣新洗健形容

官園樹影晝陰、咫尺清涼莫浣心桃李別教人主掌  
烟花不稱我尋蛭塘晚噪風枝穩翡翠閒眠宿處深  
爭似出塵地行止東林苔徑入西林

看金陵圖

六朝圖畫戰爭多最是陳宮計數訛若愛蒼生似歌舞

隋皇自合恥干戈

寄南嶽岳秦禪師

江頭默想坐禪峰  
白石山前萬丈空  
山下獵人應不到  
雪深花鹿在菴中

片雲

水底分明天上雲  
可憐形影似我身  
何妨舒作從龍勢  
一雨吹消萬里塵

寄清溪道者

萬重千疊紅霞嶂  
夜燭朝香白石龕  
常寄溪窗凭危檻  
看經影落古龍潭

病中勉送小師往清涼山禮大聖

豐衣足食處莫住聖迹靈踪好遍尋忽遇文殊開慧眼  
他年應記老師心

謝人惠拄杖

何處雲根采得來黑龍狂欲作風雷知師念我形骸老  
教把經行拄綠苔

送楚雲上人往南岳刺血寫法華經

剝皮刺血誠何苦欲寫靈山九會文十指漉乾終七軸  
後來求法更無君

送胎髮筆寄仁公

內惟胎髮外秋毫綠玉新裁管束牢老病手疼無那爾  
却資年少寫風騷

謝西川曇域大師玉筋篆書

玉筋真文久不興  
李斯傳到李陽冰  
正愁千載無來者  
果見僧中有個僧

偶作寄王秘書

七絲湘水秋深夜  
五字河橋日暮時  
借問秘書郎此意  
靜彈高詠有誰知

謝人惠紙

烘焙幾工成  
曉雪輕明百幅疊  
春冰何消才子題  
詩外分與能書貝葉僧

答文勝大師清桂書

纔把文章干聖主  
便承恩澤換禪衣  
應嫌六祖傳空袖

只向曹溪永息機

寄懷曾口寺文英大師

著紫袈裟名已貴吟紅菡萏價兼高  
秋風曾憶西遊處門對平湖滿白濤

懷道林寺道友

四絕堂前萬木秋碧參差影壓江流  
閒思宗杜題詩板一月凭欄到夜休

放鶴放猿絕句四首上辭主人

華亭來復去芝田丹頂霜毛性可憐  
縱與乘軒終悞主不如還放却遼天

堪憶春雲十二峰野桃山杏摘香紅  
王孫可念愁金鑠

縱放斷腸明月中

放鷺鷥

白蘋紅蓼碧江涯日暖雙雙立  
睡時願揭金籠放歸去  
却隨沙鶴鬪輕絲

放鸚鵡

隴西蒼巘結巢高本為無人識  
翠毛今日籠中強言語  
乞歸天外啄含桃

白蓮集卷第九

白蓮集卷第十

雜歌行四十四首  
七言絕句四十一首

廬 岳 僧 齊 己 撰

猛虎行

磨爾牙錯爾爪  
狐莫威兔莫狡  
飢來吞噬取腸飽  
橫行不怕日月星  
皇天產爾為生猛  
前村半夜聞吼聲  
何人按劍燈熒：

西山窠

西山中多狼虎  
去歲傷兒復傷婦  
官家不問孤老身  
還在前山：下住

君子行

聖人不生麟龜何  
瑞梧桐不高鳳凰  
何止吾聞古之有

君子行藏以時進退求己榮必為天下榮恥必為天下恥苟進不如此退不如此亦何必用虛偽之文章取榮名而自美

善哉行

大鵬刷翮謝溟渤青雲萬層高突出下視秋濤空渺漲  
舊處魚龍皆細物人生在世何容易眼濁心昏信生死  
願除嗜慾待身輕携手同尋列仙事

日日曲

日日日東上日日日西沒任是神仙客也須成朽骨浮  
雲滅復生芳草死還出不知千古萬古人葬向青山為  
底物

耕叟

春風吹叢衣暮雨滴箬笠夫婦畊共勞兒孫飢對泣田  
園高且瘦賦稅重復急官倉鼠雀群只待新租入

苦熱行

離宮劃開赤帝怒喝起六龍奔日馭下土熬々若煎煮  
蒼生煌々無處避火雲崢嶸焚沈寥東臯老農腸欲焦  
何當一雨蘇我苗為君擊壤歌帝堯

苦寒行

冰峰撐空寒轟々雲凝水凍埋海陸殺物之性傷人之  
慾既不能 疾藥荆棘之根株又不能展鳳凰麒麟之  
拳跼如此則何如為和煦為膏為雨自然天下之榮枯

融之于萬戶

春風曲

春風有何情旦暮來林園不問桃李主吹落紅無言

城中懷山友

春城來往桃李碧艷暖紅香斷消息吾徒自有山中隣  
白晝冥心坐嵐壁

讀李賀歌集

赤水無精華荆山亦枯槁玄珠與虹玉燦々李賀抱清  
晨醉起臨春臺吳綾蜀錦胸襟開狂多兩手掀蓬萊珊  
瑚掇盡空土堆

風琴引

撥吳絲雕楚竹高託天風拂為曲一宮商在素空鸞  
鳴鳳語翹梧桐夜深天碧松風多孤窗寒夢驚流波愁  
魂傍枕不肯去翻疑住處隣湘娥金風聲盡薰風發冷  
泛虛堂韻難歇常恐聽多耳漸煩清音不絕知音絕

夏雲曲

紅嵯峨爍晚波乖龍慵卧旱鬼多熾萬壓天塹颶  
雷電光空閃好雨不雨風不風徙倚穹蒼作岩險男  
巫女覓更走魂焚香祝天不聞天若聞必能使爾為  
潤澤洗埃氛而又變之成五色捧日輪將以表唐堯虞  
舜之明君

讀李白集

竭雲濤剗巨鰲搜括造化空牢々冥心入海々神怖驪  
龍不敢為珠主人間物象不供取飽食遊神向玄圃鏘  
金鏗玉千餘篇膾吞炙嚼人口傳湏知一々丈夫氣不  
是綺羅男女言

祈貞壇

玉甃瑤壇二三級學僊弟子參差入霓旌隊仗下不下  
松檜森々天露濕殿前寒氣束香雲朝祈暮禱玄元君  
茫々俗骨醉更昏樓臺十二遙崑崙崑崙縱廣一萬二  
千里中有五色雲霞五色水何當斷欲便飛去不要九  
轉神丹換精髓

黃雀行

雙々野田雀上下同飲啄暖去栖蓬蒿寒歸傍籬落殷  
勤避羅網乍可遇鵬鷄々々雖不仁分明在寥廓

石竹花

石竹花開照庭石紅鮮自稟離宮色一枝兩枝初笑風  
猩々血潑低々叢嘗嗟世眼無真鑒却被丹青苦相陷  
誰為根尋造化功為君吐出平原膽白日當午方盛開  
彤霞灼々臨池臺繁香濃艷如未已粉蝶遊蜂狂欲死  
寄南岳白蓮道士能於長嘯  
猿猱休啼月皎々蟋蟀不吟山悄々大耳仙人滿頷須  
醉倚長松一聲嘯

古劍歌

古人手中鑄神物百煉百淬始提出今人不要強研磨  
蓮鐔星文未曾沒一彈一撫聞鈴：老龍影奪秋燈明  
何時得遇英雄主用爾平治天下去

湘妃廟

湘烟濛々湘水急汀露凝紅衰蓮濕蒼梧雲疊九疑深  
二女魂飛江上立相携泣鳳蓋龍 追不及廟荒松朽  
啼飛猩筓鞭迸出階基傾黃昏一岫陰風起新月如眉  
生澗水

巫山高

巫山高巫女妖兩為暮兮雲為朝楚王憔悴魂欲消秋  
猿嗥々日將夕紅霞紫烟凝老壁千岩萬壑花皆坼但

恐芳菲無正色不知今古行人行幾人經此無秋情雲  
深廟遠不可覓十二峰頭插天碧

贈持法華經僧

衆人有口不說是即說非吾師有口何所為蓮經七軸  
六萬九千字日之夜々終復始乍吟乍諷何悠揚風篁  
古松含秋霜但恐天龍夜叉乾闥衆鬪塞虛空耳皆聳  
我聞念經功德緣舌根可等金剛堅他時劫火洞燃後  
神光燦々如紅蓮受持身心苟精潔尚能使煩惱大海  
水枯竭魔王輪幢自摧折何況更如理行如理說

剗腸龜

爾既能于靈應久存其生爾既能于瑞胡得迷其死剗

腸徒自屠曳尾復何累可憐濮水流一葉泛莊子

贈岩居僧

石如麒麟岩作室秋壇漫壇淨于漆袈裟蓋頭心在無  
黃猿白猿啼日日

觀李瑀處士畫海濤

巨鰲轉側長鱗翻狂濤顛浪高漫々李瓊奪得造化本  
都盧縮在秋毫端一揮一畫皆筋骨滉漾崩騰大鯨  
瓦仙搓擺欲沉下頭應是驪龍窟昔年曾夢涉蓬瀛  
唯聞撼動珊瑚聲今來正嘆陸沉久見君此畫思前程  
千尋萬派功難測海門山小濤頭白今人錯認錢塘城  
羅刹石底奔雷霆

昇天行

身不沈骨不重驅青鸞駕白鳳幢蓋飄飄入冷空天風  
瑟：星河動瑤闕參差阿母家樓臺戲閉凝彤霞五三  
仙子乘龍車堂前碾爛蟠桃花回首却顧蓬山頂一點  
濃嵐在深井

還人卷

李白李賀遺機杼散在人間不知處聞君收在芙蓉江  
日鬪鮫人織秋浦金梭軋：文離：吳娃越女羞上機  
鴛鴦浴烟鸞鳳飛澄江曉映餘霞輝仙人手持玉刀尺  
寸寸酬君珠與璧裁作霞裳何處披紫皇殿裏深難覓

輕薄行

玉鞭金蹀躞蹄橫眉吐氣如虹霓五陵春暖芳草齊  
笙歌到處花成泥日沈月上且鬪雞醉來莫問天高低  
伯陽道德何唾唾仲尼禮樂徒卑栖

浮雲行

大野有賢人大朝有聖君如何彼浮雲揜閉白日輪安  
得東南風吹散八表外使之天下人共見堯眉彩

煌煌京洛行

聖君垂衣裳蕩々若朝旭大觀無遺物四夷來率服清  
晨迴北極紫氣蓋黃屋雙闕聳雙鰲九門如川瀆梯山  
航海至晝夜車相續我恐紅塵深變為黃河曲

弔汨羅

落日倚闌干徘徊汨羅曲冤魂如可弔烟浪聲似哭我  
欲考龜鼉之心烹魚龍之腹爾既啖大夫之血食大夫  
之肉千載之後猶斯暗伏將謂唐堯之尊還如荒悴之  
君更有逐臣于焉葬魂得以縱其噬恣其吞

贈念法華經僧

念念念今入惡易念念念今入善難念經念佛能一般  
愛河竭處生波瀾言公少年真法器白晝不出夜不睡  
心心緣經口緣字一空寥、燈照地沉檀卷軸寶函盛  
蒼蔔香薰水精記空山木落古寺閒松枝鶴眠霜霰乾  
牙根舌根冰滴寒珊瑚槌打紅琅玕但恐蓮花七朶一  
時坼朶、似君心地白又恐天風吹天花繽紛如雨飄

袈裟況聞此經甚微妙百千諸佛真秘要靈山說後始  
傳來聞者雖多持者少更堪誦入陀羅尼唐音梵音相  
雜時舜絃和雅薰風吹文王武王絃更悲如此爭不遣  
空碧中有龜來聽有鬼來聽亦使人間人聞者敬見者  
敬自然心虛空性清淨此經真體即毗盧雪嶺白牛君  
識無

短歌寄鼓山長老

雪峰雪峰高且雄峩々堆積青冥中六月赤日燒不鎔  
飛禽瞥過人難通嘗聞中有白象王五百象子皆威光  
行圍坐繞同一色森々影動旃檀香于中一子最雄猛  
稱尊獨踞虎山頂百千眷屬陰影身照曜吞我景我聞

岷國民皈依前王後王皆師資宜同梁武遇達摩過後  
彈指空傷悲

漁父

夜釣洞庭月朝醉巴陵寺却歸君山下魚龍窟邊睡生  
涯在何處白浪千萬里曾笑楚臣迷蒼黃汨羅水

采蓮曲

越溪越女江蓮齊菡萏雙婍娟嬉遊向何處采摘且同  
舡浩唱發容與清波生漪漣時蓬島嶼泊幾共鴛鴦眠  
襟袖既盈溢馨香亦相傳薄暮歸去來苾羅生碧煙

啄木

啄木啄木鳴林響壑貪心既緣利甯斯鑿有朽百尺微

卷十  
虫斯宅以啄去害啄更彌劇層崖豫章聳幹蒼々毋縱  
爾啄殘我棟梁

靈松歌

靈松靈松是何根株盤擗枝幹與群木殊世眼爭知蒼  
翠容薜蘿遮躰深朦朧先秋瑟々生谷風青陰倒卓寒  
潭中八月天威行肅煞萬木凋零向霜雪唯有此松高  
下枝一枝々在無摧折癡凍頑冰如鐵堅重々鏢到槎  
牙顛老鱗枯節相把捉踉蹌立在青崖前有時深洞興  
雷電飛電繞身光閃爍乍似蒼龍驚起時攫霧穿雲欲  
騰躍夜深山月照高枝踈影細落莓苔磯千年朽枿因  
雨出一株寒韻鏘琉璃安得良工妙圖鴈寫將偃蹇埋

煙閣飛瀑聲中戰歲寒紅霞影裏擎蕭索

蠹

蟲不自蠹而蠹于木蠹極木心以豐爾腹偶或成之胡  
為勗人々而不貞由爾亂神蠹兮蠹兮可全其生無託  
爾形霜松雪檉

行路難

行路難君好看驚波不在黥黥間小人心裡藏崩湍七  
盤九折寒嶠崿翻車倒蓋尤堪出未似是非唇舌危閣  
中潛毀平人骨君不見楚靈均千古沉寃湘水濱又不  
見李太白一朝却作江南客

謝徽上人見惠二龍障子以短歌酬之

我見蘇州崑山金城中金城柱上有二龍老僧相傳道  
是僧繇手尋常入海共龍鬪又聞蜀國王局觀有孫通  
跡盤屈身長八十尺遊人爭看不敢近頭觀寒泉萬丈  
碧近有五羊嶽上人間工小筆得意新畫龍不誇頭角  
及鬚鱗只求筋骨與精神嶽上人真執者惠我雙龍不  
言價等閒不敢將懸掛恐似葉公好假龍及見真龍却  
驚怕

絕句四十二首

送人往長沙

荆門歸路指湖南千里風飄興可諳好聽鷓鴣啼雨處  
木蘭舟晚泊春潭

偶題

時事懶言多忌諱  
野吟無主苦縱橫  
君看三百篇章首  
何處分明著姓名

寄山中叟

清泉碧樹夏風涼  
紫蕨紅粳午爨香  
應笑晨持一盂苦  
腥膻市裏叫家常

贈琴客

曾携五老峰前過  
幾向雙松石上彈  
此境此聲誰更愛  
掀天羯鼓滿長安

勉吟僧

千途萬轍亂真源  
白晝沙形夜斷魂  
忍著袈裟把名紙

學他低折五侯門

送人歸華下

蓮華峰翠濕凝秋  
舊業園林在下頭  
好束詩書且歸去  
而今不愛事風流

夏日城中作二首

三面僧鄰一面厝  
更無風露可吹涼  
他年舍此歸何處  
青壁紅霞裏石房

竹低莎淺雨濛濛  
小檻幽窗暑月中  
有境牽懷人不會  
東林門外翠橫空

默坐

燈引飛蛾拂燭迷  
露淋栖鶴壓枝低  
冥心坐睡蒲團穩

夢到天台過剡溪

水邊行

身著袈裟手杖藤水邊行止不妨僧禽棲日落猶孤立  
隔浪秋山千萬層

寄鄭谷郎中

人間近遇風騷匠鳥外曾逢心印師除此二門無別妙  
水邊松下獨尋思

翡翠

水邊飛去青難辨竹裏歸來色一般磨吻鷹鷂莫相害  
白鷗鴻鶴滿沙灘

與節供奉大德遊京口寺留題

柳岼晴緣十里來水邊精舍絕塵埃煮茶嘗橘興何極  
直到殘陽未欲回

謝荆幕孫郎中見示樂府歌集二十八字

長吉才狂太白顛二公文陣勢橫前誰言後代無高手  
奪得秦王鞭鬼鞭

謝陰符經勉送藏休上人二首

事遂鼎湖遺劍履時來渭水擲魚竿欲知賢聖存亡道  
自向心機反覆看

一林霜雪未霑頭爭遣藏休肯便休學盡世間難學事  
始堪隨處任虛舟

幽齋偶作

幽院纔容箇小庭  
疎篁低短不堪情  
春來猶賴隣僧樹  
時引流鶯送好聲

贈念法華經僧

萬境心隨一念平  
紅芙蓉折愛河清  
持經功力能如是  
任駕白牛安穩行

對菊

無艷無妖別有香  
栽多不為待重陽  
莫嫌醒眼相看過  
却是真心愛澹黃

閉門

正是閉時爭合閉  
大家開處不須開  
還防朗月清風夜

有箇詩人相訪來

勉送吳國三五新戒歸

法王遺制付仁王  
難得難持劫數長  
努力只須堅守護  
三千八萬是垣墻

夏日寄清溪道者

老病不能求藥餌  
朝昏祇是但焚燒  
不知誰為收灰骨  
壘石栽松傍寺橋

送惠空北遊

君向峴山遊聖境  
我將何以記多才  
丁寔墮淚碑前過  
寫取斯文寄我來

寄懷歸州馬判官

三年為倅興何長歸計應多事少忙又見秋風霜衰樹  
滿山椒熟水雲香

觀荷葉露珠

霏微曉露成珠顆宛轉田田未有風任器方圓性終在  
不妨翻覆落池中

苦熱懷玉泉寺寄仁上人

火雲如燒接蒼梧原野烟連大澤枯謾費葛衫葵扇力  
爭禁泉石潤肌膚

觀盆池白蓮

素萼金英歎露開倚風凝立獨徘徊應思潏灩秋池底  
更有歸天伴侶來

折楊柳詞四首

鳳樓高映綠陰、凝重多含雨露深莫謂一枝柔軟力  
幾層牽破別離心

館娃宮畔响廊前依託吳王養翠烟劍去國亡臺殿毀  
却隨紅樹噪秋蟬

穠低似中陶潛酒軟極如傷宋玉風多謝將軍遠營種  
翠中閑草戰旗紅

高僧愛惜遮江寺遊子傷殘露野橋爭似著行垂上苑  
碧桃紅杏對搖、

答長沙丁秀才

月、便車奔帝闕年、貢士過荆臺如何三度槐花落

未見故人携卷來

戒小師

不肯吟詩不聽經  
禪宗異岳懶遊行  
他年白首當人問  
底言譚對後生

題舊拄杖

親采匡廬瀑布西  
層崖懸壁更安梯  
携行三十年吟伴  
未有詩人

酬歐陽秀才卷

三十篇多十九章  
聲風力撼疎篁不堪更有精搜處  
誰見瀟湘雨夜堂

聞雁

卷十  
古  
瀟湘浦暝全迷鶴還遶川寒祇有鷗誰向孤舟憶兄弟  
坐看蓮影度河橋

送高麗二僧南遊

日邊鄉井別年深中國靈踪欲遍尋何處名山逢長老  
分明認取祖師心

謝猿皮

貴向獵師家買得携來乞與坐禪床不知摘月秋潭畔  
曾對何人啼斷腸

酬光上人

禪言難後到詩言坐石心同立月魂應記前秋會唵處  
五更猶在老松根

送僧歸日本

日東來向日西遊一鉢閒尋徧九州却憶雞林本師寺  
欲歸還待海風秋

庚午歲十五夜對月

海澄空碧正團圓吟想玄宗此夜寒玉兔有情應記得  
西邊不見舊長安

白蓮集卷第十

卷一  
五  
陳氏直齋書解云唐僧齊己白蓮集十卷風  
騷旨格一卷今兼得之為合璧矣元書北宋  
刻傳世久湮滅首卷數字尚俟善本補完與  
皎然貫休三集並傳嘉靖八年歲己丑金閭  
後學柳僉志

風騷旨格

六詩

廬岳僧齊己撰

詩有六義

詩有十體

詩有十勢

詩有二十式

詩有四十門

詩有六斷

詩有三格

風騷旨格

六詩

一曰大雅

二曰小雅

三曰正風

四曰變風

五曰變大雅

六曰變小雅

大雅

一氣不言含有象萬靈何處謝無私

小雅

天流皓月色池散芰荷香

正風

都來消帝力全不用兵防

變風

當道冷雲和不得滿郊芳草即成空

變大雅

蟬離楚樹鳴猶少葉到嵩山落更多

變小雅

寒禽沾古樹積雪占蒼苔

詩有六義

一曰風

高齊日月方為道動合乾坤始是心

二曰賦

風和日暖方開眼雨潤煙濃不舉頭

三曰比

丹頂西施頰霜毛四皓鬚

四曰興

水諳彭澤濶山憶武陵深

五曰雅

卷簾當白晝移榻對青山

遠道擎空鉢深山踏落花

六曰頌

君恩到銅柱蠻款入交州

詩有十體

一曰高古

千般貴在無過達一片心閒不柰何

二曰清奇

未曾將一字容易謁諸侯

三曰遠近

已知前古事更結後人看

四曰雙分 舡中江上景晚泊早行時

五曰背非 山河終決勝楚漢且橫行

六曰無虛 山寺鐘樓月江城鼓角風

七曰是非 須知項籍劍不及魯陽戈

八曰清潔 大雪路亦宿深山水也齊

九曰覆粧 疊嶽供秋望無雲到夕陽

十曰闔門 卷簾黃葉落鏢印子規啼

詩有十勢

獅子返擲勢 離情遍芳草無處不萋々

猛虎踞林勢 窗前閒詠鴛鴦句壁上時觀獬豸圖

丹鳳銜珠勢 正思浮世事又到古城邊

毒龍顧尾勢 可能有事關心後得似無人識面時

孤鴈失羣勢 詩闕

洪河側掌勢 游人微動水高岍更生風

龍鳳交吟勢 崑玉已成廊廟器澗松猶是薜蘿身

猛虎投澗勢 仙掌月明孤影過長門燈暗數聲來

龜潛巨浸勢 養猿寒嶂疊擎鶴密林疎

鯨吞巨海勢 袖中藏日月掌上握乾坤

詩有二十式

一曰出入 雨漲花爭出雲空月半生

二曰高逸 夜過秋竹寺醉打老僧門

三曰出塵 逍遙非俗趣楊柳謾春風

四曰迴避

鳥正啼隋柳人須出楚山

五曰並行

終夜冥心坐諸峯叫月猿

六曰艱難

覓句如探虎逢知似得仙

七曰達時

高風飄雨雪一室掩香燈

八曰度量

還有冥心者閑尋此境來

九曰失時

高秋初雨後夜半亂山中

十曰靜興

古屋無人到殘陽滿地時

十一曰知時

前村深雪裏昨夜一枝開

十二曰暗會

重城不鎖夢每夜自歸山

十三曰直擬

禹力不到處河聲流向西

十四曰返本

又因風雨夜重到古松門

十五曰功勳 馬曾金鏃中身有寶刀痕

十六曰拋擲 琴書流二國風雨出秦關

十七曰背非 山河終決勝楚漢且橫行

十八曰進退 日午游都市天寒住華山

十九曰禮義 送我杯中酒與君身上衣

二十曰兀坐 自從青草出便不下堦行

詩有四十門

一曰皇道 明堂坐天子月朔朝諸侯

二曰始終 養雛成大鶴種子作高松

三曰悲喜 兩行燈下淚一紙嶺南書

四曰隱顯 道晦金雞伏時來木馬鳴

五曰惆悵

此別又千里少年能幾時

六曰道情

誰來看山寺自是掃松門

七曰得意

此生還自喜餘事不相侵

八曰背時

白髮無心鑷青山得意多

九曰正風

一春能幾日無雨亦多風

十曰返顧

遠憶諸峰頂曾栖此性靈

十一曰亂道

苦雨漲秋濤狂風翻野燒

十二曰抱直

須知三尺劍只為不平人

十三曰世情

要路爭先進閒門避處多

十四曰康救

傍人皆默語當路好提防

十五曰貞孝

無家空托夢主祭不從人

十六曰薄情

君恩秋後薄日夕向人疎

十七曰忠正

敢將心為主豈想語從人

十八曰相成

怪得登科晚須逢聖主知

十九曰嗟歎

淚流襟上血髮白鏡中絲

二十曰俟時

明主未巡狩白頭猶釣魚

二十一曰清苦

在處人投卷移居雨著衣

二十二曰騷愁

已難消永夜況復聽秋霖

二十三曰睠戀

欲起游方興重來繞塔行

二十四曰想像

溪霞流火色松日照爐光

二十五曰志氣

未拋无遠路難作便歸人

二十六曰雙擬

冥目冥心坐花開花落時

二十七曰向時六黑壤生紅木黃獺領白兒

二十八曰傷心六國空流血孤祠掩落花

二十九曰鑿戒 因思後庭曲懶上景陽樓

三十曰神僊 一為嵩嶽客幾喪雒陽人

三十一曰破除 大都時到此不是世無情

三十二曰蹇蹇 氣蒸垂柳重寒勒牡丹遲

三十三曰鬼怪 山魅隔窗舞鵬鳥入簾飛

三十四曰亂道 日落月未上鳥栖人獨行

三十五曰世情 如何人少重都為帶寒開

三十六曰雅風 日落無行客天寒有去鴻

三十七曰嗟歎 拭淚沾襟血梳頭滿面絲

三十八曰是非

須知項籍劍不及魯陽戈

三十九曰理義

送我杯中酒與君身上衣

四十曰清潔

大雪路亦宿深山水也齊

詩有六斷

一曰合題

可憐半夜婵娟月正對五侯殘酒卮

二曰背題

尋常風雨夜應有鬼神看

三曰即事

翻嫌易水上細碎動離魂

四曰因起

閒尋古廊畫記得列仙名

五曰不盡意

此心只待相逢說時復登樓看遠山

六曰取時

西風起過鴈一一向瀟湘

詩有三格

上格用意

那堪懷遠道猶自上高樓

九江有浪舡難濟三峽無猿客自愁

中格用氣

直饒人買去還向柳邊栽

四海魚龍精魄冷三山鸞鳳骨毛寒

下格用事

片石猶臨水無人把釣竿

一輪湘渚月萬古獨醒人貫休晚泊湘江

風騷旨格

開化圖書館

Kaichua library



開化圖書館

Kaichua library

金

開化圖書館

Kaishwa library

開化圖書館

Washua Library

Blue Cyan Green Yellow Red Magenta White 3/Color


© The Tiffen Company, 2007

TIFFEN Color Control Patches

Centimetres

1 2 3 4 5 6 7 8 9 10 11 12 13 14 15 16 17  
1 2 3 4 5 6 7 8 9 10 11 12 13 14 15 16 17

Inches




白  
蓮  
集  
二

開  
館  
書  
圖  
集  
Kaikwa Library

開化圖書

Kaishua Library



TIFFEN® Color Control Patches

© The Tiffen Company, 2007

Blue Cyan Green Yellow Red Magenta White 3/Color